

2 Tīmoteo ingante Pabodo cadota ante ayænta nänö yewæmongainta

Tīmoteo ingante Pabodo yewæmongampa

¹ Botö Pabodobo inömo imopa. Wængongui nänö änö bai Itota Codito nänö nē da godongaïmo imopa. Itota Codito nempo quēwēnōnāni iñōnānite Wængongui, Minitö wantæpiyæ mīni quēwenguinō ante pönōmo ænguimīni iminipa, angacāimpa. Mänōmaï beyæ tōmengä botö imo, Mäninō ante apænebi eñencädänimpa, angä eñēninque botö tōmengä nänö nē da godongaïmo imopa. ² Tīmoteo eñēmi. Bitö botö wēmi bai inömi inte botö nē waadebi inömi imipa. Bitö acæbiimpa, ante bitö imite yewæmōmopa. Mönö Mæmpo Wængongui tönö Awēnē Itota mönö Codito tönö bitö imite waadete pönö waa cæda ate bitö gänē entawencæbiimpa, ämopa.

Itota Codito waa pönī nänö ingainö ante

³ Wēenēñedē botö wæmæidi nāni cægai bai botö adobai nämä apænte pönente adinque wentamö mongænāmaï entawēmo inte Wængongui beyæ nē cæbo imopa. Botö itädē incæ woyowotæ incæ bitö beyæ ante mäningä Wængongui ingante botö apæneyedē adocä ingante cōwē waa ate pönente apænebopa. ⁴ Botö bitö æbänö wēñapæ tamōmitapa, ante pönēninque, Botö watapæ tocæboimpa, ante bitö imite aïnente imopa. ⁵ Bitö Wængongui ingante nö wede pönēmi imipa,

ante adimo inte botö adodö ante wæætë pönëmopa. Edæ bitö ñæñæ Doida bitö wäänä Eönita tönö tömëna täno Wængonguï ingante nö wede pönente näna ingai bai bitö inömö nöwo adobai imipa, ante do ëñëmopa.

⁶ Mänömaï beyæ bitö imite iïmaï ämopa. Wængonguï nänö cædönö ante bitö cæcæbiimpa, ante botö bitonga gampo cæyömo Wængonguï pönö cæcä æninque ewocabi imipa. Inique mäninö bitö ewocadö beyænque bitö godömenque godömenque cæcæbiimpa. ⁷ Wængonguï tömengä Tæiyæ Waëmö Önöwoca ingante mönö imonte pönongä æmö inique mönö wii tömengä beyæ guïñente ewocamopa. Wæætë mäniwoca beyæ tæi ewocamö imopa. Ayæ adowoca ingante ewocadinque waodäni inänite waadete pönëmö imopa. Adowoca beyæ mönö, Nöinö cæcæimpa, ante pönëninque nämä wææ ante cæmö imopa.

⁸ Mönö Awënë Itota Codito nänö angainö bitö ëñëninö ante bitö guingo imönämaï inte apænecæbiimpa. Botö adobai, Tömengä nänö angainö botö ëñëninö ante botö apænebo beyæ botö imote tee mönedäni wæyömote bitö mäninö adinque guingo imönämaï inte apænecæbiimpa. Wæætë botö tönö Itota ingantedö ante möna watapæ apænedö ante apænedinque bitö Wængonguï nänö tæi piñæmämo ante ewocadinque botö tönö adobai guëa caate wæcæbiimpa. ⁹ Wængonguï, Quëwencæminimpa, ante mönö imonte æninque, Minitö tæiyæ waëmö entawente quëwencæminimpa, ante mönö imonte aa pegacäimpa. Mänömaï cædinque tömengä wii mönö waa cædinö beyænque wæætë tömengä

nänö aīnēnō ante cægacäimpa. Ayæ wēēnēñedē inguipoga badönāmaī īñedē tōmengä, Itota Codito beyænque, ante pönēninque mōnō imonte waadete pönō cægacäimpa. Mäninō nänō waadete pönō cægainō beyænque tōmengä mōnō imonte æninque aa pegacäimpa. ¹⁰ Incæte ñōwoyedē mōnō imonte, Quēwenguimīni, ante nē Ængaingä Itota Codito pongä ininque tōmengä waadete nänō pönō cægainō ante edonque odōmongantapa. Ayæ Itota ingantedō ante mōnō watapæ apænedō beyæ tōmengä, Minitō mempoga wænāmaī incæminimpa, ante cædinque wantæpiyæ wænāmaī mōnō quēwenguimāmo ante edonque odōmongacäimpa.

¹¹ Wængonguī botō imote apænedinque, Itota ingantedō ante watapæ botō apænedō ante bitō apænebi ēñencädānimpa, angantapa. Angä ēñēninque botō adobaī tōmengä nänō nē da godōmo imo inte ayæ nē odōmonte apænebo imopa. ¹² Mänii beyæ botō mänōmaī wæwente quēwēmopa. Incæte, Æcänō ingante nē wede pönēmo imopa, ante do ēñēmo inte botō guingo imönāmaī imopa. Edæ botō quīnō tōmengä ingante godönimo incæ tōmengä mäninō æninque nanguī tæi ewocacä inongä inte tōmengä nänō apænte anguiönæ ganca wææ cæcæcäimpa. Mäninō ante botō ædæmō ēñēmopa.

¹³ Botō bitō imite odōmonte apænebo bitō ēñēninō ante bitō ñimpo cädāmaī ee nææncæbiimpa. Wæætē, Mäninō nō ante mōnō adodō adodō ante odōmonte apænedō impa, ante bitō adobaī adodō ante odōmonte apænecæbiimpa. Mōnō Itota Codito nempo quēwēmi inte wede pönēninque waadete pönente odōmonte apænecæbiimpa. ¹⁴ Wængonguī, Wææ

aacæbiimpa, ante bitö ïmite pönongä ænïmi inte bitö tömengä waa pönï nänö pönongainö ante wææ aacæbiimpa. Edæ mönö Wængonguï Önöwoca tönö ewocate quëwëmompä. Ìinque bitö tömengä tönö cædinque wææ aacæbiimpa.

¹⁵ Atiabæ quëwënäni ïñömö tömänäni botö ïmote ëmö cæte godänitapa, ante bitö do ëñëmipa. Edæ Piguëdo tönö Edömogænæ incæ tömënäni tönö botö ïmote ëmö cæte godatapa. ¹⁶ Önetipodo guiquënë botö wæwëmo adinque tömengä wæætë wæætë pönö cæcä beyænque botö wampo pönentabopa. Ayæ adobaï botö ïmote yæguincamë inte ñä cæyænte tee mönedäni wæyömote tömengä guingo imönämaï ingacäimpa. Ìinque tömengä tönö godongämæ quëwënäni ïnänite mönö Awënë Itota Codito waadete pönö waa cæcæcäimpa, ämopa. ¹⁷ Edæ Odömä nani quëwëñömö ïñömö pöninque Önetipodo botö ïmo ante nanguï diqui diqui minique ate ate ïinque mingacäimpa. ¹⁸ Botö Epeto nani quëwëñömö mänïñömö quëwëñömote tömengä æbänö botö beyæ pönö nanguï cæcantapa, ante bitö do ædæmö ëñëmipa. Mänömaï beyæ botö ïinque baquiönæ ïñonte Wængonguï tömengä ingante pönö waadete waa cæcæcäimpa, ämopa.

2

Itota Codito beyæ waa tontado bai cæcæimpa

¹ Ayæ bitö botö wëmi bai ïnömi inte ëñëmi. Itota Codito nempo quëwëñömite tömengä waadete pönö cæcä beyænque bitö tæï ewocabi incæbiimpa, ämopa. ² Waodäni tæiyænäni ëñëñönäni botö æbänö ante apænebo bitö ëñëninö ante bitö

wæætē wadāni nē pōnēnāni inte cōwē ædæmō cædāni iñōnānite adodō ante odōmonte apænebi eñencædānimpa. Eñēninque tōmēnāni nē nō cædōnāni inte adobaī wadāni inānite odōmonte apænequināni inānipa, ante tōmēnāni inānite āmi gocædānimpa.

³ Bitō Itota Codito beyæ waa tontado baī inōmi inte bitō wæwēmi incæ ee ongonte godōmenque cæcæbiimpa, āmopa. ⁴ Waocā tontado badingue nānō cæyedē tōmengā, Botō awēnē botō imote waa acæcāimpa, ante tōmengā nānō ānonque ante eñente cæcæboimpa, āninque wadāni tontado ināmaī ināni nāni cæbaī cædāmaī inongā ingampa. ⁵ Gānā cæcæte ante nē owempocā iñōmō, Cōwē nāni cægāi baī owempodāni, ante nāni wææ angainō ante eñente cæcā ininque tōmenganque godōmenque waa owempodique gānā cædinque poganta æmaingampa. ⁶ Amīña bayedē pancamonga pancamonga æñōnāni gōnea ante nē nanguī cæcā iñōmō tōmengā tāno ænguēnengā ingampa. ⁷ Māninō imæca quēwēnāni nāni cæ baī ante mēnea go adodeque botō āninō ante pōnēñōmi mōnō Awēnē edæ bitō imite odōmongā eñēninque bitō edonque pōnī eñencæbiimpa.

⁸ Itota Codito awēnē Dabii wodi nānō pæingā inongā inte do wæninque nē ñāni omæmongaingā ingante ante pōnencæbiimpa. Māninō ante watapæ botō apænedō impa. ⁹ Mānīne beyænque botō caate wæwēmo imopa. Edæ nē wēnæ wēnæ cæcā ingante tee mōnecōnē ñā cæyænāni baī botō imote adobaī mānīne botō apænedō beyænque ñā cædāni wæbopa. Incæte Wængonguī nānō angainō ædō cæte ñā cæyænte inguīi. ¹⁰ Mānōmaī

beyæ Wængonguī nänö apænte æninäni beyænque ante cæyömote wadäni ancaa wænæ wænæ cædäni wæbo incæte botö ñimpo cædämaī inte godömenque cæbopa. Edæ Wængonguī nänö ñäö apäiyömö nāni cōwē quēwenguinque mäninäni Itota Codito ængä beyænque tōmengä nempo quēwencædänimpa, ante cædinque botö wæwëmo incæte godömenque cæbopa.

¹¹ Iīmaī ante nāni änö nāwangä ante impa.

Mönö Itota Codito tönö godongämæ wængaimö inte adobaī tōmengä tönö cōwē wænāmaī quēwencæmōimpa.

¹² Mönö tōmengä tönö ñimpo cædämaī inte ee cæte wæwëmö inte adobaī tōmengä tönö nē awënëidi badinque godongämæ aacæmōimpa.

Mönö, Tōmengä ingä dicæ abogaa, ämö ininque tōmengä adobaī näëmæ mönö imonte, Dicæ abogaa, ämaingampa.

¹³ Mönö wede pönënö ante ædæmö cædämaī imö incæte tōmengä guiquënë mönö imonte cōwē pönëninque cōwē ædæmö cædongä ingampa.

Iñæmpa tōmengä iñömö nāmä nänö ingainö ante ñimpo cædämaī inongä inte tōmengä wadö ante pönënämaī ingampa.

Wængonguī bitö imi, Waa cæbi abopa, anguingä, ante

¹⁴ Waodäni inänite apænedinque bitö, Mäninö ante pönëedäni, ante wæætë wæætë ancæbiimpa. Mönö Wængonguī ayongä iīmaī ante wææ ante nanguī apænebi eñencædänimpa. Minitö, Ædedö i, ante wadodö wadö ante püinte tededämaī

incæminimpa. Īñæmpa mänömaï bai äninque mönö änö ĩñömö önonque ante impa. Ayæ mänömaï ante tedemö eñëninque në eñënanï ĩñömö æmæ pönente babainänipa, ante bitö wææ ancæbiimpa, ämopa. ¹⁵ Bitö Wængonguï ayongä, Botö në waa cæbo incæboimpa, ante nanguï cæcæbiimpa. Në cæbo inte guingo imönämaï incæboimpa, ante cædinque Wængonguï nö nänö angainö ante tömëmi në ædæmö eñente entawëninque mäninonque ante töinö ante wadäni inänite waa odömonte apænecæbiimpa. ¹⁶ Tæiyæ waëmö ewocadämaï inte wadäni önonquedö ante tedeyönäni bitö tömënäni inänite eñënämaï inte nänënë wadæ goe. Edæ mäninäni Wængonguï ingante emö cædinque cöwë godömenque wiwa näni cæquinque wadæ godänipa. ¹⁷ Baö ñömæiñömö aca podinque nanguï godömenque baayö bai mäninäni näni odömonte apænewënö adobai wodo wodo go ĩninque wadäni tæiyænäni eñëninque oda cæcædänimpa.

Mäninäni näni tedewencabo ĩñönäni Īmëneo tönö Pideto adodaque ĩnapa. ¹⁸ Tömëna Wængonguï näwangä nänö angainö ante ñimpo cæte wadæ godina ĩnapa. Ayæ, Mönö ñäni ömæmönö ĩñömö ĩnque bagatimpa, ante tedewëna eñëninque wadäni pancadäniya näni wede pönënö incæ wido cæte bai quëwënanipa. ¹⁹ Incæte Wængonguï näwangä nänö angainö mönö pönënö ĩñömö tæi gönonte bai cöwë ongompa. Mäninö ante mënea ante ĩmaï yewæmonte bai ongompa. Edæ Wængonguï Awënë tömengä quinäni ædänidö ĩnänii, ante do eñengampa. Ayæ tömengä emöwo ante, Botö Awënë ĩongä ingampa, ante në änäni ĩñömö tömënäni tömänäni, Mönö wiwa cædimämo ante

wæte wædinque wadæ goquēnēnāni inānīpa.

²⁰ Nē ēacā oncōnē ñænæncōnē tōmengā nānō waa waa cō cæincade iñōmō oodo inte padata inte nāni badōincade mæ ongompa. Adobaī wacade awæmpaincade daicade incade mæ ongompa. Pancacadea iñōmō waëmoncooque da wēincade incade pa. Wacade guiquēnē ōmæpocooque da wēincade incade pa. ²¹ Waocā wēnæ wēnæ nānō entawēnō ante ñimpo cædinque nāmā ñā mēnongate baī quēwengā inique tōmengā iñōmō waëmoncooque da wēincade baī inongā inte Wængonguī beyæ waa cæcā imaingampa. Tōmengā tæiyæ waēmō ēwocate quēwengā babaingampa. Inique tōmengā Awēnē nānō ānō ante do cæcā imaingampa. Ayæ, Quīnō waa cæquīnō i, ante tōmengā do cæcā imaingampa.

²² Edēnīnāni wīwa nāni cæinēnō ante bitō ñimpo cæte wodii gote baī quēwencæbiimpa. Wæætē waodāni mīmō ñā mēnongate entawēnāni inte Wængonguī ingante nē apænedāni tōnō bitō nō cæquēnēnō ante cæte quēwencæbiimpa. Mōnō wede pōnēnō ante godōmenque pōnente quēwencæbiimpa. Waodāni inānite godōmenque waadete pōnencæte ante cæcæbiimpa. Ayæ mōnō piyænē cæte quēwenguīmāmo ante pōnēninque cæcæbiimpa. ²³ Ōnonquedō ante apænedinque nē, Ædedō i, ante wacā tōnō guēadō guēa tedewengā mānōmaī tedecā beyænque wadodō wadō pīinte tedewēnānīpa, ante do ēñēmīpa. Inique tōmēnāni nē pōnēnāmaī ināni inte ōnonquedō ante apæneyōnāni bitō tōmēnāni tōnō godongāmæ apænedāmaī incæbiimpa.

24 Mönö Awënë ingante nē cæcä iñömö tömengä wadäni tönö wadodö wadö piinte tededämaï incæcäimpa. Wæætē tömänäni inänite ædæmō cæcæcäimpa. Ayæ wadäni tömengä ingante wënæ wënæ cædäni adinque tömengä wæætē pïinämaï inte piyænē cæcæcäimpa. Ayæ tömengä nē waa odömönte apænecä incæcäimpa. 25 Tömengä apænecä eñëninque nē eñënäni iñömö Baa ante wadö änäni inänite tömengä ædæmō cæte, İimaï impa, ante odömönte apænecä eñencædänimpa. Edæ Wængonguï pönö cæcä ate tömënäni nämä incæ. Wënæ wënæ cæmō awædö, ante wædinque tömengä näwangä nänö angainö ante eñencædänimpa, ante pönente cæcæcäimpa. 26 Ayæ tömënäni eñënämaï encadäni incæ nē eñenguinäni wæætē bacædänimpa, ante pönente cæcæcäimpa. Wënæ iñömö tömënäni inänite bæi ongöninque tömengä, Botö änö eñente quëwencæminimpa, ante godö cæcä ate tömengä nänö nē bæi ongönäni wæætē aamö cæte wodii gocædänimpa, ante adobaï pönente cæcæcäimpa.

3

İinque bayedë waodäni æbänö quëwenguinäni, ante

1 Tımoteo eñëmi. İinque eönæ bacæ cæyedë wënæ wënæ ba wæquinö angüënë. 2 Mäniñedë edæ waodäni nämanque waadete pönenguinäni inänipa. Tömënäni nänö godönte æninta waadete pönente nänö wædö ante quëwenguinäni inänipa. Tömënäni nämanque, Botö gomonga waa cæbo imopa, ante pönenguinäni inänipa. Wængonguï ingante godö wënæ wënæ ante babæ angüinäni

inānīpa. Wadāni inānite badete toquīnāni inānīpa. Wēñænāni incæ wæmpoda inate ēñēnāmaī cæquīnāni inānīpa. Wadāni pōnō waa cædāni incæte tōmēnāni nē waa cædāni inānite wæætē waa cædāmaī inguīnāni inānīpa. Ayæ tæiyæ waēmō entawēnāmaī inguīnānīmpa. ³ Adobaī waadete pōnēnāmaī quēwenguīnāni inānīpa. Mānīnāni inānite wēnæ wēnæ cædāni adīnque tōmēnāni wæætē pīīnīnque ñīmpo cædāmaī inte wēnæ wēnæ cæquīnāni inānīpa. Wadāni inānitedō ante babæ ante ānewenguīnāni inānīpa. Tōmēnāni nāni cæīnēwēnō ante nāmā wææ ānāmaī inte do cæquīnāni inānīpa. Ayæ wadāni inānite ædæmō cædāmaī inte pīīnte cæquīnāni inānīpa. Wadāni, Quīnō waa impa, ante pīīnguīnāni inānīpa. ⁴ Tōmēnāni nāni guīdēnāni incæ, Wēnæ wēnæ bate wæcædānīmpa, ante godō odōmonguīnāni inānīpa. Tōmēnāni pōnēnāmaī inte do wēnæ wēnæ cæquīnāni inānīpa. Tōmēnāni nāmā incæ, Botō gomonga waa ēñēmopa, ante pōnēwenguīnāni inānīpa. Wængonguī ingante waadete pōnēnāmaī inguīnāni inte wæætē tote quēwengæīmpa, ante nāmanque waadete pōnenguīnāni inānīpa. ⁵ Tōmēnāni Wængonguī ayongā waa cæte quēwēnāni baī adobaī cædāni incæte Wængonguī nānō tæī pīñæmāmo pīīwēnīnque nāmanque cæte quēwēnānīpa tōō.

Īnīnque bitō mānīnāni inānite gomō ae. ⁶ Mānōmaī baī cædāni īñōmō waa apænedīnque waodāni oncōnē wāānē guīdānīpa. Onquiyænāni wīī tæīmō entawēnāni inte tōmēnāni nāni wēnæ wēnæ cædī teēmēmō mongænte baī ināni īñōnānite oncōnē nē guīdāni īñōmō, Onquiyænāni mōnītō

apænedö ante eñente cæcædänimpa, ante cædäni ate onquiyænäni wæætë oda cæte godänipa. Mäninäni onquiyænäni iñömö, Quiëmë nani wënæ wënæ cæinëmämo, ante wadö gote wadö gote oda cædänipa. ⁷ Tömënäni cöwë eñencæte ante cædäni incæte wapiti wapiti cædäni iñinque Wængonguï nawangä nänö angainö ante cöwë eñente badämaï inänipa. ⁸ Wëenëñedë Möitee wodi Equitobæ tæiyæ awënë ingante apæneyongä Aänee tönö Aämodee në idöna inte Möitee ingante püinque, Önonque angampa, äna ingadaimpa. Iñinque bayedë në wënæ wënæ cædäni guiquënë iina inöna nana cægai bai adobai cædinque Wængonguï nawangä nänö angainö ante Baa ante wadö änäni inänipa. Tömënäni ocaidë pönente wentamö encadäni inte oda cæte godänipa. Iñinque Wængonguï ingante mönö pönëmämo incæ dicæ pönënaniyaa. Wængonguï tömënäni inänite Baa ancæcäimpa. ⁹ Iñæmpa ædö cæte godömenque cæquinänii. Mänina në idöna nana önonque cægainö ante edonque agadäni bai tömënäni nani önonque cædinö ante waodäni tömänäni adobai edonque pöni acædänimpa.

Tímoteo ingante Pabodo iñinque wææ angampa

¹⁰ Bitö iñömö, Æbänö botö odömonte apæneboo, ante, Æbänö waa quëwëmoo, ante, Æbänö pönente ante, Iïmaï cæcæboimpa, ante cæboo, ante bitö tömänö ante do eñëmipa. Ayæ Wængonguï ingante botö pönëmämo ante waodäni inänite botö ee cæpämo ante botö waadete pönëmämo ante botö wæntædämaï inte cæpämo ante bitö adobai do eñëmipa. ¹¹ Ayæ botö imote togænte pänäni botö

wæpāmo ante ayæ botō wæwēmāmo ante bitō do eñēmipa. Wadāni quiēmē wēnæ wēnæ cæcæte ante botō imote togænte pānāni wæbo incæ botō wæntæye ināmaī intabopa. Antioquiya iñōmō Icónio iñōmō adobaī Ditada nāni quēwēñōmō māniñōmō wēnæ wēnæ cædāni wæbo incæte mōnō Awēnē o ængā beyænque ayæ quēwēmo imopa. ¹² Nō ante impa. Æcānō, Botō Itota Codito nempo quēwēmo inte Wængonguī ayongā waa cæte quēwencæboimpa, ante āna tōmengā ingante togæwēnque wēnæ wēnæ cædāni wæqingā ingampa. ¹³ Waodāni wēnæ wēnæ cædāni tōnō, Oda cæcædānimpa, ante nē cædāni iñōmō tōmēnāni nē wēnæ wēnæ cædīnāni inte godōmenque wēnæ wēnæ cæquīnāni inānīpa. Edæ mānīnāni inānite wapiticæ māodāni oda cæte cædīnāni inte tōmēnāni wæætē wadāni inānite adodō, Æpiticæmē oda cæquīnānidō, ante cæcædānimpa.

¹⁴ Bitō guiquēnē æbānō eñēnīmi inte, Nō impa, ante pōnēnque cōwē ñimpo cædāmaī incæbiimpa. Edæ bitō imi ædānidō odōmonte apænedānīi, ante do eñēmipa. ¹⁵ Wængonguī angā eñēnte tæiyæ waēmō nāni yewæmongainō ante bitō wēñæmiyedē mā eñēnīnque ñōwo ganca do eñēmitawo. Mānīnō ante nāni yewæmongainta ate eñēnīnque bitō Itota Codito ingante pōnēñōmi tōmengā ængā beyænque quēwencæbiimpa.

¹⁶ Wængonguī pōnō apænecā eñēnīnque waodāni tōmēnāni nāni eñēnonque ante Wængonguī beyæ yewæmongadānimpa. Tōmēnāni Wængonguī nānō odōmonte apænegainō ante nāni yewæmongainta adīnque mōnō, Æbānō waa impa, ante eñēnīnque mōnō odōmonte apænecæimpa. Wængonguī angā

ēñente nāni yewæmongainta adinque, Quinö mönö wēnæ wēnæ cædinö ii, ante mönö do ēñēninque nē wēnæ wēnæ cæcä ingante mönö wææ angæimpa. Ayæ Wængonguī angä ēñente nāni yewæmongainta adinque nē oda cæte wæcä ingante, Mönö nöinö cæquēnēnö iīmaī impa, ante mönö odömonte apænecæimpa. Nö cæte quēwencæminimpa, ante odömonte apænete ongö ate mönö ēñēnö ante mönö waodāni inānite odömonte apænecæimpa. ¹⁷ Edæ Wængonguī beyæ nē odömonte apænecä iñömö eyepæ ēñengä inte tömengä nänö waa cæquimāmo tömāmāmo ante cæcæcäimpa, ante odömonte apænecæte ante yewæmongadānimpa.

4

¹ Waodāni mīināni quēwēnāni incæ do wængaināni incæ tömānāni inānite mönö Itota Codito nē apænte anguingä inte tömengä Awēnē Odeye badinque ponte a ongongä acæimpa. Tömengä ayongä ayæ mönö Mæmpo Wængonguī ayongä botö bitö imite, Iīmaī cæe, ämopa. ² Wængonguī nänö angainö ante apænebi ēñencædānimpa. Waodāni Ao ante, Eñēinēmöni ante änāni incæ Baa ante ēñēnāmaī ināni incæ bitö cōwē apænebi ēñēnānie. Wængonguī nänö angainö ante oda cæte wædāni adinque bitö, Mönö nöinö cæquēnēnö ante cæcæminimpa, ancæbiimpa. Wēnæ wēnæ cædāni inānite, Ædö cæte mänömaī cæminii, ante nanguī ancæbiimpa. Ayæ adobaī, Wampo pönencædānimpa, ante ædæmö apænebi ēñencædānimpa. Mäninö tömānö cædinque nanguī

waadete ee cædinque adodö adodö ante odömönte apænebi eñencædänimpa.

³ İncayæ ate nö odömönte mönö apænedö ante waodäni Baa anguinäni inänipa. Mäninö ante eñenämäi incæmönimpa, ante änäni inte tömönäni wæætë, Mönö eñeinënonque ante odömönte apæneedäni, ante nê odömönte apænedönäni nangui inäni inänite diqui diqui minte acædänimpa. Mäninqedö ante eñencæmönimpa, ante anguinäni inänipa. ⁴ Mäninäni näwangä angainö ante eñenämäi inte wadæ godinque wæætë önonquedö ante dodäni näni angainö ante eñente cæquinäni inänipa. ⁵ Bitö guiquënë tömëmi quëwenganca æbämë baquii incæ godömenque cæcæbiimpa. Caate wæbi incæte bitö ñimpo cædämäi inte godömenque cæcæbiimpa. Wængongui waa pönï nänö apænedö ante apænebi eñencædänimpa. Bitö cæquënëno tömäa iinque cæcæbiimpa.

⁶ Wængongui qui, ante näni godönö bai botö adobai iñömöte wantæ iñonte wænönäni wæncæboimpa. Edæ botö wænguiönæ oo pönï impa. ⁷ Botö tæi ewocabo inte Awënë Itota beyæ botö cæquënëno waa pönï iinque cætabopa. Gänä cæcæte ante nê pogodo godäni næ gongænämäi näni iinque goganca godäni bai botö adobai tömëmo quëwenganca wæntæye inämäi inte iinque cætabopa. Mönö wede pönëno ante botö ñimpo cædämäi inte cöwë pönentabopa. ⁸ Mönö Awënë nê nö apænte anguingä iñömö tömengä nänö apænte anguiönæ iñonte tömengä, Bitö nö pönente waa cædimi inte bitö waa cædinta ante poganta æncæbiimpa, ante botö imöte pönongä æncæboimpa. Wii botö adoboque iñömöte pönongä æncæboimpa. Wadäni

adobaï tōmengä nänö pongä aquíönæ ante nanguï aïnente nē wänö cönäni inäni adinque tōmengä, Minitö nō cæte quēwēnimīni inte mīnitö waa cædinta ante poganta æncæminimpa, ante tōmēnāni tōmānāni inānite pōnongä æncædānimpa.

Timoteo quīnō cæcæcāimpa, ante

⁹ Bitö eyepæ inte botö weca quingæ pōe, ämopa.
¹⁰ Deēma iñömö inguipogaque ante botö imote emö cæte Tetadōnica nāni quēwēñömö gocantapa. Ayæ Quedetente iñömö Gadatiabæ iñömö gocantapa. Adobaï Tito Dadāmatiabæ iñömö gocantapa. ¹¹ Odoca adocanque botö weca ongongampa. Mäadoco ingante adinque tōmengä ingante botö weca ænte māmōmi pongäi. Edæ botö cæquēnēnō ante cæyōmote tōmengä botö tōnō guēa nanguï cæcä ingampa. ¹² Ayæ Tiquico ingante botö Epeto iñömö da godōmo gocantapa. ¹³ Botö yacoo ocoi ä wecoo Todoa iñömö Cadopo oncōnē botö emö cæte pōnincoo bitö ponte ate ænte pōe. Adobaï botö dibodocoo ænte māmōmi æmoe. Botö tæinetacoo yewæmōintacoo, ante godōmenque wæbopa. Māninta cōwē māmōmi æncæboimpa, ämopa.

¹⁴ Adecantodo tæineta nē badongä inongä iñömö botö imote nanguï wēnæ wēnæ cæcä wætabopa. Mānōmaï cæcä adinque Wængonguï edæ tōmengä nänö wēnæ wēnæ cædinganca māninganca tōmengä ingante wæætē pancæcāimpa, ämopa. ¹⁵ Māningä bitö imite adobaï wēnæ wēnæ cædāmaï incæcāimpa, ante bitö adobaï wææ cæcæbiimpa. Edæ mōnō odōmonte apænedö ante

tömengä cöwë Baa ante wadö ante quëwënungä ingampa.

¹⁶ Botö imote në apænte änungä weca ænte mäodäni gote ongöningue botö nämä incæ wææ ancæte ante mä apæneyömo æcänö botö tönö godongämæ äna edæ dæ änäni wætabopa. Tömänäni edæ botö imote ëmö cæte wadæ godänitapa. Mänömaï näni cædinö beyæ Wængongui tömënäni inänite pïinämaï incæcäimpa, ämopa. ¹⁷ Incæte, Wadäni wii oodeoidi inäni tömämæ quëwënäni Wængongui waa pönï nänö apænedö ante ëñencædänimpa, ante cædinque mönö Awënë iñömö botö gäänë ongöningue botö tönö godongämæ cæcä beyænque tæi ewocabo inte apænetabopa. Ìimæca awënë nempo wæwente quëwëñömote mönö Awënë wæætë gä pe æmpote ö ængä beyænque quëwëmopa. ¹⁸ Mänömaï bai cædinque botö imote quiëmë wënæ wënæ cædäni wæbo incæ mönö Awënë Odeye botö imote ænguingä beyænque quëwencæboimpa. Adobai tömengä öönædë nänö aayömö botö imote adimongä ænte mæicä æite goquimo imopa. Wængongui ñäö apäite bai ëmönongä ingante mönö cöwë waa acæimpa, ämopa. Mänömaï babaimpa, ante Amëë, ante ämopa.

Tımoteo ingante Pabodo, Waa quëwencæbiimpa, angampa

¹⁹ Pidica tönö Aquidæ nänä gæncaya waa quëwencædaimpa, ämopa. Bitö tömëna inate adodö apænebi ëñënae. Adobai Önetipodo tönö godongämæ quëwënäni waa quëwencædänimpa, ämopa. Bitö tömënäni inänite adodö apænebi

ēñēnānie. ²⁰ Edaato Coodinto iñōmō ayæ a ongongantapa. Ayæ Todopīmo nē wēnæ wēnæ iñongā botō tōmengā ingante Miideto iñōmō ēmō cæte gotabopa. ²¹ Bitō eyepæ inte cōönædepo badāmaï iñedē botō weca quingæ pōe, ämopa. Eobodo iñōmō tōmengā, Bitō waa quēwencæbiimpa, angā ēñēninge botō bitō imite adodō ämo ēñēe. Podænta tōnō Diiino ayæ Codaodia tōnō möni pōnencabo tōmāmōni bitō imite, Waa quēwencæbiimpa, ämōnipa.

²² Mönō Awēnē Itota Codito bitō tōnō ongonte incæcäimpa, ämopa. Ayæ Wængonguï bitō imite waadete pōnō cæcæcäimpa, ante mäningue ante yewæmōmopa.

Wængonguī nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690